

## **RESOLUSI PERSIDANGAN PERWAKILAN NASIONAL KE-49 TAHUN 2020 PARTI GERAKAN RAKYAT MALAYSIA**

KAMI, PERWAKILAN, Persidangan Perwakilan Nasional ke-49 (NDC) 2020 Parti Gerakan Rakyat Malaysia (PGRM) berikrar;

### **1. KELUHURAN PERLEMBAGAAN DIUTAMAKAN SEBAGAI ASAS PERPADUAN NEGARA**

Bahawasanya, Parti Gerakan Rakyat Malaysia akan sentiasa mempertahankan keluhuran Perlembagaan Persekutuan sebagai undang-undang tertinggi dalam Persekutuan Malaysia dan yakin dengan prinsip Rukun Negara sebagai kitab penyatuan Bangsa Malaysia. GERAKAN menekankan pentingnya setiap warganegara Malaysia menghormati ketertinggian Perlembagaan Persekutuan dan setia kepada prinsip-prinsip yang diterjemahkan dalam Rukun Negara. Sebagai parti politik nasional, GERAKAN akan sentiasa berpegang kepada kedua-dua piagam suci negara.

### **2. SOKONGAN KEPADA YAB TAN SRI MUHYIDDIN YASSIN SEBAGAI PEMIMPIN UTAMA UNTUK MEMBIMBING NEGARA MEMERANGI PANDEMIK COVID-19**

Bahawasanya, Parti Gerakan Rakyat Malaysia menyokong penuh kepimpinan YAB Tan Sri Muhyiddin Yassin sebagai Perdana Menteri Malaysia. GERAKAN berpendapat apa yang penting sekarang adalah kestabilan politik. Politik yang stabil mampu membantu dari segi polisi dan pentadbiran dalam urusan melawan pandemik COVID-19 yang melanda negara kita sejak bulan Februari 2020. Kepimpinan YAB Perdana Menteri sangat menyerlah dan berpotensi mengembalikan Malaysia ke pangkal kestabilan. Maka, adalah adil untuk semua, termasuk rakyat sekalian untuk mengekalkan kepimpinan YAB Perdana Menteri.

### **3. RAKYAT DAN KEBAJIKANNYA PERLU DIUTAMAKAN SERTA PENELITIAN BERTERUSAN PERLU DILAKUKAN OLEH AGENSI BERKAITAN DALAM USAHA MEMBEKALKAN KEBAJIKAN YANG MANTAP**

Bahawasanya, Parti Gerakan Rakyat Malaysia menyeru kerajaan untuk terus meneliti, merangka dan menyumbang sebanyak mungkin bantuan kebajikan, pemulihan dan pembangunan kepada rakyat. Kesan wabak COVID-19 adalah amat dahsyat dan rakyat akan menjadi mangsa jika tidak diberi bantuan yang sewajarnya. GERAKAN menghargai pelan-pelan rangsangan yang telah diumumkan oleh kerajaan persekutuan sebelum ini, namun berharap kajian dan penelitian dapat dilakukan dari masa ke semasa dan bantuan terus disalurkan sehingga keadaan pulih sepenuhnya. Rakyat, tanggungjawab bersama.

#### **4. REVOLUSI PENDIDIKAN DAN KESAKSAMAAN SEBAGAI ASET NEGARA**

Bahawasanya, perubahan dan penerimaan adalah asas kepada setiap anjakan pembangunan. GERAKAN percaya bahawa pendidikan adalah tiang penyatuan yang perlu dinilai dari masa ke semasa, dan acuannya perlulah berasaskan persekitaran semasa. Dunia kian semakin pesat membangun, buku teks diganti dengan peranti teknologi, internet dijadikan perantara pengajaran, dan pandemik COVID-19 jelas menunjukkan bahawa pentingnya kita mengadaptasikan pendekatan teknologi seiring dengan perubahannya. Maka, Parti Gerakan Rakyat Malaysia menyeru kerajaan untuk menerokai revolusi pendidikan terutama dan sejajar dengan penggunaan teknologi pintar moden. Kerajaan juga perlu memastikan tiada Anak Malaysia yang tertinggal dalam anjakan pendidikan ini, tidak kira dari mana dia berasal, pendalaman ataupun bandar, penyampaian kemudahan dan pembangunan pendidikan perlulah saksama.

#### **5. PERPADUAN DAN KEHARMONIAN NASIONAL PERLU DIANGKAT UNTUK MALAYSIA YANG GEMILANG**

Bahawasanya, kita harus ingat akan polarisasi yang serius antara kaum dan agama di negara ini. Kita mesti mengelak sebarang perselisihan yang boleh menjejaskan keharmonian rakyat berbilang kaum. Dasar Perpaduan Negara menyentuh kepada pentingnya rakyat Malaysia untuk bersatu menyemarakkan semangat perpaduan dan mewujudkan sebuah identiti nasional. Maka, Parti Gerakan Rakyat Malaysia memohon kerajaan untuk melaksanakan sepenuh-

penuhnya setiap peruntukan dalam Rangka Tindakan Perpaduan Negara 2021-2030, dan sentiasa menyemak, mengkaji semula, dan membangunkan tindakan-tindakan yang membekalkan kepada perpaduan nasional. Kepelbagaian kaum, keturunan dan bahasa dalam masyarakat kita adalah aset dan identiti Malaysia, bersatu kita melindunginya.

**6. BANTUAN BERBENTUK SOKONGAN DAN KEWANGAN KEPADA KOMUNITI USAHAWAN KECIL DAN SEDERHANA DALAM MENGHARUNGI KESAN KETIDAK-TENTUAN PANDEMIK COVID-19**

Bahawasanya, kerajaan perlu menyalurkan sebanyak mungkin bantuan kepada komuniti usahawan kecil dan sederhana yang terjejas perniagaan akibat penularan COVID-19. Usahawan PKS memerlukan suntikan modal pusingan dalam usaha memulih perniagaan sedia ada yang terjejas. GERAKAN menyeru kerajaan untuk terus mencari dan melaksanakan formula pemulihan yang dapat membantu meringankan beban usahawan mikro dan seterusnya merencanakan kegiatan ekonomi Malaysia.

**7. UTAMAKAN KAUM WANITA DAN MEMPERKASAKAN PENGLIBATAN WANITA DALAM URUSAN EKSEKUTIF NEGARA**

Bahawasanya, peranan wanita adalah amat penting dalam pembentukan negara, Maka, Parti Gerakan Rakyat Malaysia berpendapat pentingnya memperkasakan penglibatan wanita dalam sistem eksekutif negara seperti dalam Dewan Negara, Dewan Rakyat, Dewan Undangan Negeri dan Jemaah Menteri. GERAKAN memohon kerajaan untuk memperkenalkan segala pendekatan serta strategi yang bertujuan untuk meningkatkan penyertaan wanita dalam urusan eksekutif negara, ia termasuk merangka undang-undang yang berkaitan dalam mewajibkan jumlah minima penglibatan wanita dalam badan eksekutif dan perundangan.

**8. TIADA YANG TERCICIR, IMPAK POSITIF KEPADA SEMUA MELALUI PEMANTAPAN PENDEKATAN DIGITAL NEGARA**

Sebagai sebuah negara yang pesat membangun dan mengadaptasikan perubahan teknologi digital yang ketara. Rakyat tidak kira negeri, wilayah dan status sosial perlu diberi ruang yang secukupnya dalam menikmati kepesatan pendekatan teknologi. GERAKAN menjulang usaha kerajaan dalam memperkasakan setiap rakyat Malaysia untuk meningkatkan literasi digital, mewujudkan pekerjaan berpendapatan tinggi, menjadikan urusan perbankan dan kewangan lebih mudah melalui Rangka Tindakan Ekonomi Digital Malaysia. Maka, Parti Gerakan Rakyat Malaysia menyeru kerajaan untuk terus fokus dan melabur kepada pembangunan digital termasuk di separa dan luar bandar. GERAKAN teguh tiada siapa yang tercicir dalam perubahan yang akan membawa impak positif kepada semua.

#### **9. KESTABILAN EKONOMI AGENDA UTAMA NEGARA**

Bahawasanya, kesan pandemik COVID-19 yang merupakan krisis sedunia ini masih berleluasa dan terus mengancam kestabilan ekonomi negara. Sejumlah rakyat hilang pendapatan, adanya industri kecil dan sederhana yang terpaksa gulung tikar, pelaburan tergugat, kilang-kilang besar terpaksa memberhentikan pekerja, pelancongan tergendala dan sebagainya. Maka, Parti Gerakan Rakyat Malaysia berpendapat antara tugas utama kerajaan pada masa kini adalah untuk mengenal-pasti segala tindakan, strategi dan pelaksanaan dalam memulihkan ekonomi negara, mengembalikan kegemilangan kewangan dan menstabilkan keadaan sosial-ekonomi rakyat.

#### **10. MAKA KAMI, RAKYAT MALAYSIA BERSATU UNTUK NEGARA YANG TERCINTA INI, SATU HATI!**

Bahawasanya, Parti Gerakan Rakyat Malaysia menyeru seluruh rakyat Malaysia untuk bersatu dan mengutamakan kepentingan negara. Rakyat Malaysia perlulah bersatu menghadapi dan memerangi cabaran pandemik COVID-19. Hanya sebuah masyarakat yang bersatu dapat merealisasikan kegemilangan untuk negaranya. Maka, inilah masanya untuk kita semua bersatu, mengeneipkan perkauman, tanpa mengira keturunan, bahasa dan wilayah, bersatu untuk negara yang tercinta, Malaysia, Satu Hati!